

Skýrsla formanns

Velkomin á aðalfund Klifurfélags Vestfjarða.

Mig langar að byrja á segja nokkur orð um félagið sjálft og tilurð þess.

Klifurfélag Vestfjarða varð formlega félag haustið 2020 þegar það fékk kennitölu (661020-1800). Drifið var í að stofna félag þegar fyrirætlanir um byggingu innklifuraðstöðu á Ísafirði stefndu loks í að verða að veruleika. Í nokkur ár á undan hafði góður hópur klifuráhugafólks hér á Ísafirði haft augun opin fyrir hentugu húsnæði og spáð eitthvað í þessum málum en ekki mikið gerst. Loks komst skriður á.

Nauðsynlegt var að stofna félag og fá kennitölu til að auðvelda það að safna styrkjum og gera þetta allt saman formlegra.

Auk þess að byggja upp innklifuraðstöðu er markmið félagsins að vinna að uppbyggingu klettklifur- og grjótlímusvæða úti í náttúru Vestfjarða. Þau eru nokkur nú þegar en klárlega möguleikar á meiru.

Í lögum félagsins segir þetta meðal annars:

“Félagið er áhugamannafélag og er tilgangur þess að iðka klifuríþróttir, stuðla að framgangi klifuríþróttá á Vestfjörðum og auka áhuga fólks á hvers kyns klettklifri og grjótlímu. Einnig að vekja athygli á Vestfjörðum sem álitlegu svæði til að stunda klifuríþróttir.

Félagið hyggst ná tilgangi sínum með námskeiðahaldi, keppnum og annars konar kynningarstarfsemi, auk þess sem félagið hyggst stuðla að því að félagsmönnum standi til boða fullnægjandi æfingaaðstaða, innanhúss sem utan.”

Tvö ný útiklifursvæði hafa verið byggð upp á Vestfjörðum síðan árið 2020. Annað við Ögurnes í Ísafjarðardjúpi sem er tilvalið fyrir börn og byrjendur. Þar hafa verið settar upp fimm boltaðar leiðir í 6-8 metra háum klettum. Stutt er á milli bolta og allt hugsað þannig að það sé sem hentugast fyrir börn, lágvaxna og þá sem eru að stíga sín fyrstu skref í leiðsluklifri. Hitt svæðið er í Valþjófsdal í Önundarfirði. Þar eru núna fimm boltaðar leiðir, allar í erfiðari kantinum. Kletturinn er mjög heillegur og hreinn, mjög hnetugur til klifurs. Stefnt er á að setja þar upp fleiri leiðir.

Miklir möguleikar eru á að stunda grjótlímu úti (bouldering), nokkrir mjög álitlegir staðir eru t.d. í nágrenni við Ísafjörð en einnig miklu víðar á Vestfjörðum.

Árið 2021 og fyrrihluti 2022 fóru mest í að litast um eftir hentugu húsnæði og safna styrkjum. Við Óliver Hilmarsson skoðuðum ýmsa staði, létum gera teikningar, 3D líkön og spáðum almennt heilmikið í þetta. Einn daginn litum við inn í gamla skátaheimilið og sáu að það gæti hentað. Við fengum leyfi hjá skátunum til að setja upp klifuraðstöðu í helmingi salarins.

Við hófumst handa við byggingu klifurveggjanna inni í skátaheimilinu haustið 2022, eftir að einhver peningur hafði safnast í baukinn, styrkir höfðu fengist. Vil ég sérstaklega nefna hér Borea Adventures en að öðrum ólöstuðum má segja að fyrirtækið sé allra sterkasti bakhjarl félagsins, hefur styrkt það mjög mikið og meðal annars fjármagnað kaup á dýnum og flutning þeirra til landsins sem og að fjármagna segldúk á dýnur. Fleira er hægt að telja til. Meðal annarra fyrirtækja vil ég nefna Örnú mjólkurvörur,

Orkubú Vestfjarða, HG, Snerpu og Vestfirska verktakar. Einnig hafa ýmsir einsaklingar lagt til hvort tveggja fjármuni og vinnu.

Þess má geta að þrjú ár í röð hefur verið reynt að fá styrk úr Uppbyggingasjóði Vestfjarða en okkur alltaf verið neitað og það á mjög hæpnum forsendum. Ef þetta sem við erum að gera er ekki uppbygging og það á einhverju sem er nýtt og kemur landshlutanum vel hvað varðar lýðheilsu og ótal margt fleira, þá veit ég ekki hvað.

En skátaheimilið var nánast orðið annað heimili okkar Ólivers á tímabili, við vorum þar flest öll kvöld að smíða haustið 2022. Hinir og þessir kíktu við og réttu hjálparhönd eða veittu andlegan stuðning. Vinna við smíði sjálfra veggjanna lauk að mestu rétt fyrir jólin 2022.

Klifurgrip fengust notuð frá Noregi, dýrnarnar einnig. Þegar kom að því að setja upp gripin hafði okkur borist liðsauki, hún Hjördís Björnsdóttir hafði flutt í bæinn en hún er mikill klifrari og reyndur þjálfari og leiðsmiður úr klifurhúsinu í Reykjavík. Síðan hún flutti hefur hún starfað mikið með félaginu og þjálfað á námskeiðum. Hún kemur einmitt inn í stjórn núna.

Eftir að klifuraðstaðan var orðin nothæf fengu ýmsir að prófa þótt enn væri verið að vinna í hinu og þessu smálegu. Um óformlegar opnanir var að ræða í fyrstu. Erlendu stúdentarnir úr Háskólasetrinu voru mjög áhugasamir og svo kíkti almenningur við á opna daga sem haldnir voru í tilefni íþróttaviku Evrópu m.a. og af fleiri tilefnum. Síðan í byrjun þessa árs hafa síðan verið fastir opnir tímar fjórum sinnum í viku þar sem allir eru velkomnir. Hefur ekki verið rúkað fyrir klifrið enda viljum við fyrst um sinn bara kynna þetta sem mest og fyrir sem flestum. Hvað verður í framtíðinni þarf að koma í ljós.

Við höfum verið með starfandi það sem ég kalla "lykilhóp", lítinn hóp fólks sem undanfarið hefur starfað innan félagsins og séð um opnanirnar, sett upp nýjar leiðir og ýmislegt fleira. Þetta er lykilhópur því hann er einmitt með lykila að klifuraðstöðunni og er að almennt mjög mikilvægur fyrir félagið á ýmsan hátt. Vil ég hér með þakka Vaidas Valentukevicius, Hjördísi Björnsdóttur, Orla Mallon, Justas Šuscickis og Łukasz Męzyk fyrir samstarfið. Ég á ekki von á öðru en að þau haldi áfram í þessu með okkur.

Í fjáröflunarskyni höfum við boðið fólki að halda upp á afmæli í klifuraðstöðunni og það verið vinsælt. Eins hafa vinahópar fengið að kíkja við, björgunarsveitirnar á svæðinu hafa verið með æfingar, krakkar úr menntaskólanum kíktu við á þemadögum og einnig hópar af börnum af Eyrarskjóli í þrjú skipti nýlega. Svo það hefur verið mikið líf í húsinu.

HSV leitaði eftir samstarfi við klifurfélagið með að koma inn með klifur á sumarnámskeið síðasta sumar. Það kom vel út og stefnt á að halda sams konar námskeið nú í sumar. Klifurnámskeið voru í vetur fyrir 3.-4. bekk Grunnskólans á Ísafirði hér í klifuraðstöðunni.

Seint á síðasta ári duttum við í lukkupottinn, fengum tækifæri til að kaupa svokallaðan Moon-æfingavegg sem var kominn til landsins en var síðan ekki settur upp þar sem til stóð. Okkur stóð því til boða að fá hann, en það hafði verið draumur okkar að koma slíkum vegg upp. Hér er um að ræða æfingakerfi, hallandi veggur (og hægt að stjórna hallanum) með klifurgripum á fyrirfram ákveðnum stöðum, eftir ákveðinni reglu („griddi“). Þannig eru allir svona veggir með eins uppröðun gripa. Þetta gerir það kleift að hægt er að nota app þar sem finna má mikinn fjölda leiða, miserfiðar, sem hinir og þessir útum allan heim dunda sér við að finna upp og hlaða inn í appið. Leið er valin og við það lýsast upp LED ljós sem eru staðsett við hvert grip. Klifrarinn sér því hvaða grip má nota þegar þessi tiltekna leið er klifruð, og hún

hefur þá ákveðna erfiðleikagráðu. Hægt er að velja um tvo halla (25 eða 40 gráður) og kalla fram leiðir í appinu í samræmi við það.

Rannís veitti styrk fyrir Moon-veggnum og einnig sóttumst við eftir uppbyggingarsamningi við Ísafjarðabæ. Hann fékkst nýverið. Það er því ljóst að við náum að fullfjármagna og -klára verkefnið og þökkum við bænum að sjálfsögðu kærlega fyrir að hafa trú á okkur og klifurverkefninu í heild.

Við trúum því að með því að koma klifrinu á kortið hér á Vestfjörðum séum við að opna augu og með innklifuraðstöðunni að bjóða upp á nýjan valkost. Ætla ekki að tíunda hér kosti klifurs en þeir eru auðvitað fjölmargir að okkar mati en það hefur sýnt sig að klifur er oft að henta börnum sem ekki finna sig í öðrum áhugamálum sem oft fá mjög mikla athygli, eins og t.d. fótbolti og aðrar hópípróttir.

Takk fyrir mig.

Björgvin Hilmarsson